

Furriadura in sardu de su contu 'LA PREGHIERA INCOMPLETA', chi ndi bessit de sa pàgina cincuantases (p. 56) de su liburu de MARCO PLACENTINO, "*Soleminis. Leggende e misteri. Contus de forredda*", Dolianova, Edizioni Grafica del Parteolla 2017.

'SA PREGADORIA LASSÀT A METADI'

Acabau chi iat de cenai, unu òmini fiat andendi a fai una passillada, ideau de passai acanta de crèsia. De su campusantu, a su costau de sa parròchia, iat intèndiu a unu tali preghendi. Iat apubau, perou, ca su tali de sa pregadoria ndi naràt sceti una parti, lassendi-dda duncas a metadi. Custu òmini no nci iat fatu contu e iat impunnau a si corcai.

Is notis infatu, passendi acanta de su campusantu, allutendi beni is origas, iat intèndiu a sa matessi boxi narendi cussa pregadoria, lassendi-dda sèmpiri a metadi, e no arrennescendi a biri chini fessit su tali, poita fiat artu su muru chi separàt su campusantu de s'arruga.

Iat ditzìdiu de sartai su muru comenti a unu furitu po ndi scruculliai calincuna noa. Si-nci fiat afaciau apitzus e iat biu a unu òmini bistiu de biancu e sterrinau a terra in mesu a is tumbas, totu pigau recitendi sa pregadoria. Fiat bistiu comenti a unu chi est parti de una cunfraria de crèsia.

In su mentris chi custu òmini naràt sa pregadoria, lompendi innui dda lassàt a metadi, foras de si fai biri, custa borta, a boxi arta, dda iat acabada de dda nai totu. In su pretzisu momentu, fiat sparèssiu.

S'incras a mengianu si fiat sprata sa noa chi fessit morta una mama giovunedda chi pagu oras innantis iat tentu una pipiedda. //